

Korosihyaapi Utipiho

Kimandi Korosihyaapi Utipimandapi Nesipihande

Napwitohipipihi Poriho konihi napwitati bindataati kimo utipimo jipatipiyataise 62 A.D. hura. Yapipati Garesiyaahanda piwiha asiwa nehiha katiwunjohipatamataiwi ami aunahipa Korosihandaahiyaatangisangi naasikati kaiwi isihiyai katiwunjawaapo. Katiwunjohiyihiya usa sapihi napiwi winihapipa jihi japepihirohiwaiwaapi kaiwa kiya japepihirito tiwi kiya katiwunjauhi kiya Korosihya piwiha akaahe, tiwi gwinyaawaapo. Siyauhi Poriho jipatipaindimandi kiya piwiha siyahaiwa windi baiwi atihomaawiwi nehi Kiraisihomi nausainjithandapuni Komi watipihandapuni Sawahopuni giwunyaitaatiwi kaundati Poriho jipatipiyataise.

Korosiyaaahiyaapi Piwiha Napimasataise

Komi piwiha namasati kaundati ipihirete undati kaundisiha (1:1-7)
Kiraishometirihiretapuni ami ko nyapi kaimbipaapuni nunjati kaundisiha (1:8-2:19)

Wanihiri gaahireti bimitaapihireti siyate undati kaundisiha (2:20-4:6)
Poriho komi piwiha osasepihaati owemati ipihirete undisiha (4:7-17)

Kimandi Utipimandi Kiraisihomi Isihiya Aunahipati Awaipati Korosihanda Bimohiyihiyaapi Poriho Jipatipaindihande

1 ¹ Nini Porihonini Kiraisi Jisaasiho ningi komi piwiha awusaitandi kandati natanoaasisihonine. Autaahaatiho sawaho maaritati gwinyaasitihandaahi Kiraisiho ningi komi piwiha otipipati naninyati natanoaasisihonine. Iyataati nyami naisoho Timoteho nyamatiyati Kiraisihopi giwunyaasiho ningisati maasi kimbihini kimore. ² Aihini nini Timotehoaisati maasi bindihaawi sahi Kiraisihoai niwipinjawi koaisawi timaamaitiwi naasiyaatimatiwi, ami Autaahaatihomi isihiyaati aunahipati awaipati Korosihanda bimohiyihiyaatapi kimandi utipimandi jipatipiyataayo. Jipatipiyataati sangi yihoaangj sataha, nyami Apiho Autaahaatiho sangi komi gaahandi kasisati anditisaiwati ami sami maariho omanjititihini neti yatihisiwati japatisati napaisaatisamane, satihaato.

Yihooanji Sapi Autaahaatihoai Gaahonje Undiha Piwaundihaato

³Yihooanji Autaahaatihoai piwaundihaahura sapi nasisoaari gisunyaaha Autaahaatiho nyami Awaisiho Jisasi Kiraisihomi Sapihoai, 'Kinyi Gaahonje gaare,' undiha piwaundihaayo. ⁴Yihooanji Autaahaatihoai, Kinyi Gaahonje gaare,' undohitimandi ami sahi Kiraisi Jisaasihopi andititiwi giwunyaapi, ami sahi Autaahaatihomi isihiya nahatiyai sami maariho nunyohitihandapi yihooanji aimi atisiha nehaawe. ⁵Iyaha ami sahi wuwanihura jihi Piwiha Waniha Gaaha sangi isihiya nesipiwi kasatauhi, ami sahi atisawaawi kaapi piwiha akiti akaahaare, ami isihiya akaahe tiwi atiwi naitaatiwihaare, tiwi gwinyaawaayopo. Gwinyaawaawi ami kahapaamapipa gaahaiwa ipotihura sangi Autaahaatiho nasamitandi nasamihanati ahisihi yamihapataatihi ahisotiwaiwaapi akiti naito tiwi sahi gwinyaapi jatawaayopo. Ami sahi saiwi jatawaahiyaatisi sahi Kiraisihopi akitinihi watipitiwi giwunyaapi ami Autaahaatihomi isihiya nahatiyai maariho nunyawaayopo. ⁶Iyataati sa piwa waniha gaaha yapihhi nahanda isihiya nesi daiwi ausaawaayopo. Ausaahauhi isihiya taahiyihiya atiwi nepemaitiwi ka piwiha japepihiriwi Kiraisihopi giwunyaawaayopo. Giwunyaahauhi ami piwiha Gaahaapuni ami Kiraisihopuni giwunyaahohiyihiyaami piwiha dahopa ami wapa kiya kiyohiwaiwa nga titihi noaipataise. Ami sandihi sahi wuwanihura piwiha waniha gaaha Autaahaatiho sangi sahi wapa gaahapa windi kamaiwi nehihandi gaahandi kasindihandapi piwiha akaaha namasawi atisauhi samihatihhi gaahaiwa nasoapasihhi mmoniwi nehohipatamatiyati kiyaisi nusoaipataise. ⁷Iyataati sa Piwiha Waniha Gaahaapitaha Epapiraasiho sangi ausaati kasatati katasisataise. Katasisihi sahi ka piwiha aimi atiwi mmoniwi nehopo. Epapiraasiho so Kiraisihomi otipipatiho gaahore, ami ko Kiraisihomi otipipati napaitati kiyahoso. Ami ko nyangisati Kiraisihomi otipipati ninawipihhi kiyaahotihhi nyahi koai nyami maariho akitinihi nunyaahore. Iyataati ko sangi biyati jatatamanati anditisiwati Kiraisihomi otipipati nyahi Kiraisihomi otipipatihiyaanini usaanami aunahipati neti samihatihhi otipipati kiyataise. ⁸Iyataati ko nyangi sahi Autaahaatihomi Itipihho neti anditisaisihhi Autaahaatihomi isihiyai maariho nunyohitihandapi kanyatataase.

Korosihiyai Autaahaatiho Anditiwiwitandi Poriho Gaapundataase

⁹Ami saiwa nahatewa sangi nasoapasiwimaiwaapi yihooanji wuwanihura namasiha sapi piwiha atisohururaapi windi namaamihaaha kuraaninihi nasisoaari sapi Autaahaatihoai piwaundiha gaapundihaayo. Gaapisundiha Autaahaatihoai nunjenihaayo, ko sangi anditisaiwati neti gisunyaahonihhi, ami sahi ko maaritati gwinyaasipipa baiwi akitinihi mmoniwi gwinyaapi nepi japepihiritaatiwo. Komi Itipihho

sangi Autaahaatiho gaahaiwa gwinyaasiwaiwa sami omanjititihhi, ami amitiheti neti gisunyaahonihi sahi kaiwa tisaipi nga naitaatiwo. ¹⁰Saiwi tisaipi newaawi Autaahaatiho isihya daiwi bitoaitaatiwi maaritati gwinyaasirihireti sahi japepihiriwi daiwi bitoaitaatiwo. Awiwi ami sahi nasisoaari isihya usaisi nehi gaahati kawiwii, ami sahi Autaahaatihopi mmoniwi gwinyaahohitihandi waati awaindemapi mmoniwi gwinyaaitaatiwo. ¹¹Yihoaaŋi sapi siyaha gaapundihaayo, Autaahaatiho komi watipihandi gaahandi awaindihanda sangi neti anditisaiwati watipihandi apipaahi gaahandi sangi nasanyati sami maariho omanjititihhi neti anditisaiwati watipisamaitando. Watipisamahonihi andititawi yaasati naanjihaiwa ami nasisesiwaiwa maariwi nga nepi bitoaitaatiwo. ¹²Saiwi sahi maariwi Apiho Autaahaatihoai, ‘kinyi gaahonje gaare,’ unditaatiwo. Ami ko sapi gaahaiwa kahapaamapipa sahi naitaatiwi nasamihainjipipa nga naitaatiwi sangi neti anditisaisihhi sahi gaahapa kaiwi japepihirawaayopo. Isi kapa sahi komi isihya komi nausainjitihandaatihi bimohiyihiyaisawi maasi naitaapo. ¹³Iyataati ami ko Autaahaatiho nyangi asihatindihandi Bwaasirihiri jatindihandaatihapi tinjaati nuwati nanyamaati, ami komi Mwaaho ko maariho apipaahi aungwohandi numwisiho Jisasi Kiraisiho nausainjitihandisati komi isihyai iwinjatisaw ihyaamihihooaagenyamataise. ¹⁴Ko Autaahaatihomi Mwaaho nunyanati nyangi nanyamaati ami nyami maipihaiwa ko nenyamataise.

Kima Piwiha Kiraisihopuni Ami Komi Otikipatihyaapihaare

¹⁵Kiraisiho Autaahaatihomatiahore. Iyati ko Autaahaatihomi titihhi siwipate. Isi isihya Autaahaatihoai windi mausonawaahandi kandi Kiraisiho utaahomatati yapimbataapihi noaipati bimisura isihya koai usonawaawi komihetapi Autaahaatihopi mmoniwi giwunyaatataise. Iyataati Autaahaatiho kahapaamapipa nahataapa kiyati ahaimbipa kapa sangi noaipasuraapi Kiraisiho Autaahaatihomi Mwaaho jihoematati aunahipati neti ko jiji bimisihosi, ami nahataapa Autaahaatiho kiyati ahaimbipai nusatipihati autaaahi mitiho jihoematati bindataise. ¹⁶Iyati kimiko Jisasi Kiraisihomi watipihandaahi kahapaamapipa nahataapa yamihapataatihuni ami yapipataapihuni ahotimbipa kiyati ahiyataise. Iyati ami nahataapa auta ahotihhi nyahi nyami ndihaara nga biyaati mmonihohipipauni, ami wapa auta windi ahimotihhi monihohipipauni nahataapa Autaahaatiho kiyati ahiyataise. Iyati ami nahataapa Autaahaatiho kiyati ahaimbipaamihatihhi wiwa itipihho yamihapataatihapihaiwa enjerihya, ami itipihho wiwa watipihaiwa watipihandisahaiwa ami wapa kahatamatipetahaiwa watipihaiwa watipihandisahaiwai maawi kiyati ahiyataise. Saiwa Kiraisihoaisatuni ami kopuni Autaahaatiho kiyati ahiyataise. Ami kaiwa nahatewa Kiraisihoai neti niwimaati koai ambipati awaipati numwitaatiwi

Autaahaatiho komi Mwaaho Jisasi Kiraisihopi kiyati ahiwisataise. ¹⁷Iyati Kiraisiho saiwa kahapaamapimba nahataapa sangi noaipasura jiji ko bimisihore. Isi ko Kiraisihopi nahataapa Autaahaatiho kiyati ahiwimbipai ko Kiraisiho sawaho neti itatamanati anitisati isiwatati jatihi, ami kapa neti kapaami ahotimbipihiti titihi komi ikwiraatihiti itatamanjinati ahotimi notaise. ¹⁸Iyataati ko Kiraisiho komi ambipatami mitiho awaisiho jihore. Iyataati komi ambipati sati isihya nahatiya kopi giwunyaahohiyihyaare. Iyati isihya nahatiya kopi giwunyaahohiyihya kiya maariwi mbipa ditihiri nepi, ami asiyihiyaimatiwi bimohitihandami ko sawaho tanyaahore. Ko kiyaisi kiyaami maariho maariwi ditihiri mbipa nepi maariwi asiyihya daiwi bimohitihandi asisiha nahateweti nunyataise. Kiya koai iwinjapepihiriwi asiyihiyaimatiwi nepaitaatiwihandapi ko Kiraisiho namasati kiyati jihoemati animwaahipatombi isihya napopi nanoposohiyihyaami jiho ko nepataise. Ko jiji nepasitimandi ami ko nahataapa kahapaamapipaamuni ami isihyaamuni awaisiho jihoematati aunahipati jiji naitande. ¹⁹Ami sandihiti Autaahaatiho sawahometirihiretihaiwa nahatewa ko gwinyaati kiyati jati mmonati maariwaiwa nahatewa kaiwaanihiti komi Mwaahomiheti ahionihiti komiheti tisaitati ahotitandi Autaahaatiho maaritati gwinyaataate. Siyataati ami Autaahaatiho komi Mwaaho Kiraisihomiheti tisaahiwati ahiyataise. Ami Mwaaho komi Sapihometirihiretihaiwa neti Autaahaatihomatetahotitando. ²⁰Iyati kahapaamapipa nahataapa yapipataapihuni ami yamihapataatihuni ahotimbipa neti Autaahaatiho sawahoaapihiti kapaisati komi maariho timaamaitati yatihiti uripatisanati ami napaisaatititandi komi Mwaahoai nehi iwinjasihiti ipi titihi atawihateti napoti jitipati nuhaataise. Aihiti sati jitipati Kiraisiho nuhaasipitaahi Autaahaatiho isihiyaisuni, ami kahapaamapipaisuni neti sawahoaapihemati piwaundati kiya isihyaapuni ami kahapaamapipaapuni koaisi apowihiti manditiwisati itihundati tiworihomajitihandi namati komi maariho yatihiwititi napaisaatindaise.

²¹Iyataati ami sahihi jihura Autaahaatihoapipihiti kaanihi nawisawi sangi yandihiti Autaahaatihomihiti tiworisaatimatiwi bimambiwihyaate. Aihiti sahi yandihiti bindawaawihiti maipihaiwa gwinyaapi ami kapa sahi gwinyaahohipipa kiyawaayopo. ²²Sahi sahi bimauhi ami Kiraisiho ipi titihi atawihateti nimaatati napotaise. Napwihiti ko napwindihanda Autaahaatiho sangi nasamaati komi naisihyaatesamati piwaasatati nahosisataise. Ami sandi ko sasindimandi ko sangi nasamaasi sawahoaapihiti niyonihi sahi noaipapi ko sawahomihiyaatimatiwi titihi gaahiyaati saasanotahiyaati komi ndiheti ainahiyihiyaatimatiwaate. ²³Ami sahi satiwi nyangi Kiraisiho japihi nanyamaitandi napotaiso, tiwi andititiwi kopi piwiha waniha gaaha sahi atisohihaapi giwunyaapi

bitotawaawaaho. Iyataati piwiha sa waniha gaaha sahi atisohiha ka ami isihiya nahatiyai kaundiwi katiwunjauhi nahataapipih i atiwi nepi kaapi gwinyaahauhi, ami nini Porihonisangi piwiha sa Kiraisihopih a ausaitandi Kiraisiho ahinihi komi otipipatihonimatataayo.

Porih o Kiraisihomi Isihiyai Anditiwiwitandi Otipipati Kiyataise

²⁴Kiraisihopi giwunyaahohiyihiya siya Kiraisiho sawahomi ambipatamataiwihyaare. Kiya saiwi komi ambipati ikwauhiyaasi nini kiyai iwitatamaniti anditiwiwitandi nisi ambipateti apipaahi yaasati tiwati miniwihaiwa taati wani nini nehohiwimaiwa maarititi netaayo, ami Kiraisihomi ambihiya kopi giwunyaahohiyihiyai anditiwiwitando. Iyataati saiwa nisi ambipati yaasati tiwati miniwihaiwa nehohiwimaiwa Kiraisiho sawahoaisangi taati netaise, ami nisi ambipati koaisati timaamaitohitihanda noaipati komi ambipati ikwauhirimatahatiso. Nisihetapi Kiraisiho komi ambipati yaawati tiwati muriwahaiwa kopi giwunyaahohiyihiyai iwitatamanati anditiwiwitandi nesiwaiwa sangi neti ami sangi owetise. Isi ami nini niwahonisi ambipati yaasati tiwati miniwihaiwa nehohiwaiwa Kiraisiho nini koaisati maasi timaamaitohitihandi sangi neti owemasiwaiwa nini neti gaamaitandi taati netaayo. ²⁵Nyahi Judaahiyaanami dawaapipihyaatangi komi piwiha kasatiti anditisiwitandi Autaahaatiho komi otipipati ningi naninyati nanimihainjih i noaipati sami otipipatihonimatataayo. Komi piwiha nahata kaanihi gaamati sangi kasatitendo. ²⁶Komi piwiha sa isihiya nahatiya jihuraahiyai windi ausaati nunjati kamundati noasati isiwati bimainjati wani kimura komi isihiyai auta ausaimanati nunjati kaundisihaaro. ²⁷Iyataati komi piwiha sa isihiya nahatiya jihuraahiya windi atihomiwi ami moniwihaare, ami ko kiyai windi nunjati kamundiho. Sawaho maaritati gwinyaasitihandaahi nyahi komi isihiyaani Kiraisihopi giwunyaahohiyihiyaanangi komi piwiha jihura noasandisiha Autaahaatiho wani aimi neti nanyisataise, ami nyahi mmondihaawo, piwiha sa apipaahi gaahaasi isihiya nahatiya nahataapipihiyai iwitatamanitandihaaso, taato. Iyataati piwa sa jihura noasandinjihaare toha siyahaapito. Kiraisiho wani yaho sami maarihoatihi bimoti ami sangisatindaise. Ko siyati sami maarihoatihi bindataati ipotihura komi apipaahi gaahaiwa yamihapataatihi sahi naitaatiwi jaawi bimitaatiwi ko taati sangi neti tisamanataise. ²⁸Aihi ami nyahi Kiraisihomi otipipatihyaanini piwiha ko Kiraisihopih a isihiya nahatiya nehi ninaasiyaisaahih i yiyandih i auta ausaawaati wapa sapa sahi kaiwise undaati kaundaati, ami kataunjawa ami wapa sapa sahi windi kamaiwise, undaati winihundihaato. Siyahaawi ami amitih a gaahaiwa biyaati gwinyaawaati ginyunyaatitandi Autaahaatiho nanyamisihaara isihiyai piwiha ausaawaati auta kaundaati winihundaati

ami katawaunjiaaayo, ami isihya ninaasohi ninaasaami Autaahaatihomi maaritati gwinyaasipapa kiya ninaasiyaahi kaiwi bitoaitaatiwhapa wapaapi kiya windi nenoahitati, ami nausetimetwi ami Kiraisihoaisawi timaamaitwi utaaho nehi naasomatawi noaipaitaatiwo. ²⁹Ami saindi isihya nahatiya ninaasohi ninaasaamihi neti Kiraisihoaisati timaamaiti wisasisanihi kiya Autaahaatihomihapa wapaapi windi nausetimetahiya noaipaitaatiwhandapi nini Kiraisiho ningi anditiniwati komi watipihandi nanimindhandaahi otipipati apipaahi watipihati kati nini watipindi kiyataayo. Kiyonihi ningi Kiraisiho komi watipihandi naninyati anditinisitihandi auta noaipataise, nini otipipati kiyohirihiretapo.

**Nyahi Kiraisihopi Watipitaati Giwunyaawaati
Pwiha Jaipipai Tiwandawaamaitihaawo**

2 ¹Ami nini sangisuni ami Kiraisihomi isihya aunahipati awaipati Reotesiyaahandaahiyaisuni, ami Kiraisihomi isihya usa nahatiya nisi ambipati ndimaahomwaaŋi maanohohiyihyai maawi anditiwiwitandi nisi anditati napamati dipiwaatohitihandapi sahi gwinyaitaatiwi kasatitandiyo. ²Nini saindi kiyohitimandi ami sahuni kiyauhi sahi nahatiyaati sami maarihoatihi omanjitihi sahi anditititaatiwhandi tisaitiwi nepi ami sahi Kiraisihomi isihyaati baiwi timaamaitwi maariho namindaatiwe. Aiwi sahi Kiraisihopi giwunyaahohitihandi anditisaiwitandihandi gaahandi gwinyaitaatiwe. Aiwi ami siyawaawi kandaahi sahi Autaahaatihomi piwiha noasandisihaami tanyaahaapi baiwi mmondaatiwe, Kiraisiho sawaho Autaahaatihomi piwiha noasandiwaiwaami tanyaahoso. ³Komiheti Autaahaatihomi piwiha gaahaiwa ami gaahandi gwinyaitihaahaiwa nahatewa tisaitati noasandataise, nawihomi anjipipihi nawiho waati tisaitati ahotipatamatiyato.

⁴Utaaho wo sangi piwiha atipati nasanyati kasatati jaipipa kasatitandihandapi pondihi ami nini piwiha sa kandaato. ⁵Ami nini sangisati maasi windi bimimonihahi sahi nisi ndimaahomwaaŋi ambipati windi maanohopo. Saiwi windi maanohauhihandi kandi nisi maariho sangisati maasindaise. Iyataati ami nini gwinyaataati saindi gwinyaataayo. Nini sangisati maasi bindataati sahi watipihyaati titihi watipitiwi bitotawaawi Kiraisihopi watipitiwi giwunyaahauhi jasoti maaritataayo.

Isihya Akiti Asitimatitaatiwhandi Jisaasihomiheti Tisaitati Ahondaise

⁶Ami sahi Kiraisi Jisaasihoai aimi numwaapi koai sami awaisihoemapi kopi giwunyaawaayowi sahi komiheti wirandiwise. Koaisawi maasi nasisoaari daiwi bitosawise. ⁷Aiwi komihetapi sahi kopi giwunyaahohitihandi anditititaatiwhandi nepise, ipati katami

damipati tambatihiri mihaapi baahi yapipataatihu naihi watipihati titihu ahutipatamataiwo. Ami aŋaŋi yasiha watipihaasini watipihaaŋi aŋimatindipatamataiwo. Aiwu piwiha waniha gaaha Jisasi Kiraisihopi sangi katawaasasohihaapi andititihu gwinyaapi ami akitihaaso tiwi anitihu isiwatiwi, ami jinjapihi kiyaatinihi Autaahaatiho nyami, 'Apihoai gaahone gaare,' undiwise.

⁸Sahi baiwi jatiniwo, ami isihya usa isihyaami nehi gwinyaahohiwaiwa jaipipa ausaapi ami piwiha nehihaiwa taanauhiha kasatisaihi ami sahi wiwa kaiwa atiwiwi iwinjapepihiritaawo. Isihya siyohiyihya nehi kiyaami saisotoya isihyaami piwiha gwinyaahohiwaiwa ami itipihu maipihapa yamihapa tiwipatuni ami yapipataapihuni jatimbipaami gwinyaitaatiwihandi nepihaiwaare. Kiraisihoapihapi ko gwinyaasitihandi kiya saiwa nepihaiwaamaahe. Owetise.

⁹Sahi sawanaati aimi mmoniwi gisunyaatahiyaate, Kiraisiho nyahi isihyaanami ambipati neti akitinihi utaahoematihu. Sati komi ambipati utaahomihateti Autaahaatihometirihiretihaiwa nahatewa tisaitati ahondaise. Ahotihu ami Kiraisiho Autaahaatihomatiyahore.

¹⁰Iyataati Kiraisiho kahatamatipetimbipa nahataapa watipihaiwa watipihandisahaiwaami mitihu jiho awaisihore. Sahi Kiraisihomihyaatitihu ami sangi Autaahaatiho asitimatitaatiwihandi nasamihi, ami sahi sandi asitimatitaatiwihandi apipaahi nga tisaipi newaayopo. ¹¹Iyataati ami sahi Kiraisihoaisawi timaamaitiwi komiheti wirandohitihanda sahi noaipapi aimi sami ambipati namandipapi ahoaandahiyaatamatetawaayopo. Ami sandihi ambipatamihandimaahe, isihya namandipatohirihireto. Kiraisiho sawaho sandi sangi kasisataise. Iyati sami maariho jahihu maipihaiwaisati Kiraisiho nesamataise.

¹²Iyataati sahi waapoho nehohura Kiraisihoaisawi timaamaitauhi Autaahaatiho sangi neti Kiraisihoaisati maasi animwaahipatopi yasamwaasihyaatamatetawaayopo. Iyataati ami Autaahaatiho komi watipihanda Kiraisihoai japihi animwaahipatombi ahowimati numwaasitihandapi sahi giwunyaahohitihanda Autaahaatiho komi watipihanda sangi maawi Kiraisihoaisati japihi animwaahipatombi isihya napohiyihyaamihatihapi ahosimati nasamaasihyaatamataiwi noaipawaayopo. Sahi waapoho nehohura sandi sangi sasimatataise.

¹³Ami Judaahiya Autaahaatihomi isihyaami dawaataatapihyaati winihapipa Autaahaatiho Mosesihoetapi komi isihya Judaahiyai numwimbipa sahi moniwi owehiyaate. Saiwi jihura sahi maipihaiwa titihimetihaiwa kihaiwa kihaiwa kiyauhi kaiwa sangi neti tiwati yasamwaasahi sami maarihoaatihi napomawaayopo. Sahi saiwihyaati setahiyaatitihandandi kandi Autaahaatiho sangi neti Kiraisihoaisati asiyihyaatesamati asitimatitaatiwihandi nasanyataise.

Iyati Autaahaatiho nyami maipihaiwa titihimetiwaiwa nahatewa nenyamataise. ¹⁴Winihapipa kapaaraahi Autaahaatiho nyangi sanyatati sahi sami maipihaiwaapi piwiha naitaatiwo, nyatati jipatipaihi jipatipindati kapa nyangi neti kapaami otitihini nanyapuwati nyaiwatati nyami maipihaiwa autemati nanyisataise. Kapa siyati piwiha naitaatiwo, tati jipatipindimbipa nahusamati Autaahaatiho kapai kapaami watipihandisati neti owemataise. Neti nahusati owemati Kiraisihomi ipi titihini atawihateti tipimandaataise. Kiraisiho nyapi ipi titihini atawihateti napwisuro. ¹⁵Iyati Kiraisiho napotati japihi nepasura Autaahaatiho itipihoni watipihaiwaami watipihandi neti kandinihi yatihiwati owemati, ami wapa wapa watipihandisahaiwaisangi tiwati ipatisati owemataise. Sandi auta Kiraisihomi ipi titihini atawihateti Autaahaatiho satati, nini nahataapa kahatamatipetihapa watipihaiwa kaiwaami watipihaiwa nahatewa titi ipihatindi yatihiti nehiihaiwemati owemataayo, tati isihiyai neti nunjataise.

Nyahi Kiraisihoaisaati Aimi Napowaamihaayoni Winihapipa Wiwa Nyangi Windi Titihemaanyamaitaise

¹⁶Isi ami sahi utaaho woai nehi nanihaiwi iwinjasaihi ko sangi ikwisisati samaasatane, sahi nandapa waapoho naniwuni ami namandaatiwuni winihapipa ahotimbipa windi minjapepihiriwi ami asisiha awaiwaiwa Autaahaatihopi gwinyaapi gaapunditaatiwihuraapi winihapipauni, ami waatiho waniho asoho noaipasura Autaahaatihopi gwinyaapi, 'kinyi gaahone gaare,' undiwi gaapunditaatiwi winihapipauni ami asisiha ikindaatiwihaami winihapipauni windi minjapepihiriwo, satato. ¹⁷Saiwa ami wapa akipipa ipoti noaipaitandihaiwa taati napihihaiwaami nehi suwipati jihi nasataise. Saiwaami titihini akipipaahi Kiraisihoe. Kiraisihosi ami ko sangi japihi nasamaati nasamaasi Autaahaatihomihini deti niyataise. ¹⁸Utaaho satati, sahi nini kasatohirihireti Autaahaatihopi gwinyaapi gaapimundopo, satsihoai sahi naingaapi windi maawinjasawi atihomaawiwise. Utaaho wo sasatsihoaiso, nini kasatohirihireti ipatisaniwi yamihapataatihapi itipihiyaapi atotipiwesawi kiyaami ambipati niwimapi gaapimundiwi ami sami ambipati tipi mupwi yaawihandi windi namunyopo, satsihoai sahi windi atihomaawiwise. Ami sohi wiwa akipipa tanyaaha owehandi nehi koai naimaatati genanataiso. Ko yapepati yapenati mmosirihiretapi naimaatati genanataise. Iyataati ko wiwa mmonahaiwaapi kandaase. Iyati ko maariho jahihomihaiwa japepihirati amitiha gaahandi gwinyaatihoniniso, tati naimaatati kandaase. Isi ami sahi koai nehi nanihaiwi iwinjasaihi ko sangi neti windi maasapatisane. ¹⁹So saiso Kiraisiho nyami mitihoaisati timaamaitirihira daihira aimi namasihi neti niwipitihihore. Ami so mitiho ko ambipati nahatepi jatati nandapa

ami waapoho nunyataise. Nunyati anditati usetiho nahotaaha nahandi biyati bitati ambipati ahendaise. Ami ambipati Autaahaatiho kati gwinyanati watipititandi gwinyaati maaritirihireti gwinyanati noaipati watipititando.

²⁰Sahi aimi Kiraisiho napwisura koaisawi maasi napomawaawi itipiho yamihapati ami yapipati jatimbipaami watipihandaatihi bimimopo. Saiwi windi itipiho watipihandisahapaami otitihimimowisahi napindapi winihapipa wapa satahapa, ²¹Kinyi kimba wapa mipe, kinyi nandapa sapa nepi namaanime, kinyi yahapa wapai isipi namumwatime, tihapa taawi japepihiropo? ²²Winihapipa sapa wapaapi katimbipaahi kapa nyahi newaati kapaara wapa otipipati nunya kiyaati ami nanihonihi keti kuraanihi neti nopisasinati owetitandihapaapi kandaase. Iyataati nehi isihya kiyaami gwinyaahohitihanda winihapipa saiwa katiwi wisasawi ahiyaw japepihiwise, nyatauhi nyahi isihyaanini japepihihaayo. ²³Iyataati ami isihyaami piwiha winihapipa sapaahi yamaati tiwatihaati nga nyangi neti anditinyaihonihini Autaahaatihopi giwunyaawaati gaapundaati, ami nyami ambipati yatihini newa ipihatisaati tiwa muwaati yaawihandi numwitihahireti noaipaitaise. Setihini ami isihya saiwi gwinyaawaayopo, winihapipa sapa amitihini gaahaiwa gwinyaahohirihireti noaipati isihyini gwinyaitawihandi gaahandi nunyataise tiwi gwinyaawaayopo. Iyataahandi kandi winihapipa saiwa maariho jihomi maaritati gwinyaasiwaiwa newaati yatihini ipihatitihawini windi nga anditimaanyaiwitaise.

Nyahi Kiraisihoaisaati Maasi Aimi Japihi Nepihaayo

3 ¹Autahaatiho sangi Kiraisihoaisati maasi aimi ahosimasihyaatisi, ami sahi mihaati yamihapaatihi Kiraisiho komi gwitihooatihi Autahaatihomi gaatihiraihoangi bimimbipihini kahapaamapipa ahotiwaiwaapawini daapi, ami kaiweti sami maariho amitihini gwinyaahohitihandi nausawini mwitipisawini ahiyawise. ²Sami maariho amitihini gwinyaahohitihandi nahandi mihaati autahi Kiraisiho bimimbipihini ahotiwaiweti mwitipisawini nausawini ahiyawise. Aiwini sahi maapi yapipatambihaweti windi nausawini ahiyawini minjatiwise. ³Ami sahi utaaho wo napomasihini komi ambipati yapipataatihi yamwaahauhini noasandipatamatawini aimi napomapi Kiraisihoaisawini maasitiwini komihetini noasandiwini Autahaatihooaisawini timaamaitawaayopo. ⁴Sahi saiwini Kiraisihomihetini isihya windi maasonihauhinihandini noasandiwini Autahaatihooaisawini timaamaitauhini Kiraisiho sahi asiyihyaati bimohitihandami sawaho tanyaahore. Sahi komihetini noasandohihini Kiraisihoai Autahaatiho neti isihyaami ndihetini ausaimanati auta natausaasonihini nasati yapipataapihini noaipahonihura sangisangi koaisawini maasi komi apipaahini awaindihandi otiwa kambwaati awaindihandi

nausainjitihandisawi noaipaitaapo. Noaipasahi ami isihya kiyaami ndihaara sangi Kiraisihoaisawi ahoyawi jasondaapo.

**Nyahi Maariho Jahiho Jihomihapa Namawaati Maariho
Asoho Waniho Newaati Wanihyaanimatihaayo**

⁵Isi ami sahi sami maariho jahiho jihomihapa maipihapa apipaahi titihimetihapa maapi yapipatambihapa windi kamaiwi namapise. Nini sandi siyahaiwa kimaiwaapito usihya asihya namaatohitihandami ipaahaapi kiyaami ambipati kihiyaisawi timaamaitiwi ami ainjotahaiwa wiwa kaiwi ami maipihaiwa pihitiwi kaitaatiwi kiyaami omanjititih windoti ngoti nehotati, ami isihya usaamihapaapi nyamapaatitando, tiwi maariho omanjititih windositihandapito. Sandi isihya usaamihapaapi maariho omanjititih maahoapati nanaapwitohitihandi sandi autaahaatiho jaipitahoai mepi autaahepumapi gaapundohitihandamatiyahande. ⁶Sahi saiwa saiwi windi kamaiwise, ami Autaahaatihoai atihomaawiwi koai nepumapi isihya saiwa kiyohiyihyaapi apowih wihooanjihandi nawihomatiyati kiyai ipotihura numwitandihandi yihandi aimi taati nasataise. ⁷Sahi jihura sami maariho jiho jahihooatihi bimohura isihya saiwa kiyohiyihyaisawi maasitiwi sikaiwa kaimbiwihyaate.

⁸Ami wanihi sahi saiwa nahatewa kaiwaanih namamapise. Sangi aposindihandi ami sami maariho omanjititih nasinaamasitihandi, ami sami maariho maipih isihya usa nepi nopisasindo tiwi mimaipaiwi gwinyaahohitihandi, ami utaaho wopi isihya ko gaahoe tiwi gwinyaahohitihandi nepi nopisasiwi koai ambipati maipihati isihyaami ndiheti numwitaatiwi gwinyapeniwi isiwatawa katohiwaiwa, ami sami maarihoatihi maipihaiwa apipaahi ainjotahapa gwinyaapi maahomwaanapi katohiwaiwa kaiwaanih namamapise. ⁹Sahi ninaasonjhi ami ninaasaanjhi sami naisihya Kiraisihomihya usai piwiha jaipundiwi kaundiwi kamanwise. Ami saiwa sami maariho jahiho jihomihaiwaahi sahi aimi namamapi maariho waniho asoho nesihyaate. ¹⁰Aiwi sahi aimi noaipapi wanihyaati asiyihyaatimatawaayopo. Autaahaatiho sawaho sangi neti wanihyaati asiyihyaatesamataise. Iyati Autaahaatiho nasisoari sangi wanihaiwa gaahaiwa pihitati kasisati nasanyati neti gisunyaataise, kaiwa gaahaiwa wanihaiwaahih sahi jinjapihi gwinyaitaatiwo. Ko saiwa gaahaiwa wanihaiwa kasisati neti gisunyaasih gaahaiwa wanihaiwaahih gwinyaapi noaipapi wanihyaatimatiwi Autaahaatiho sangi kiyati ahisisihometirihiretapihaiwa taawi newaayopo, ami siyawaawi sahi apipaahi akitinihi kopi gisunyaatonih mmondaatiwo. ¹¹Ami kimandi sangi taati kasimatindimandi kandapi sahi Autaahaatihomi isihyaati Kiraisihomi naisihyaati mmotiniwi jatinohirihireti saiwi

noaipawaayopo. Sahi usaati Judaahiyaanami dawaatapihyaatimetiwi, ami usaati titihi sangi Judaahiyaatimetiwi, ami usaati nehi sangi yandihhi sami ambipati namandipatiwihyaatimetiwi, ami usaati sami ambipati nahomaamandipapihyaatimetiwi, ami usaati nehi sangi yandihhi piwiha waatiwi yapipati witaahapihyaatimetiwi, ami sahi usaati ipataatihapihyaatimetiwi, ami sahi usaati utaaho womi otipipati nawiho owehati kawiji komi asimwaatitihapihyaatimetiwi, ami usaati nehi sangi nanihaiwi sami gwinyaapi maaritohirihireti bitopihyaatimetaawaayopo. Iyataati Kiraisiho (sawaho) saiwa nahatewai namaasati daahemati noaipati (awaisiho) jihondaise. Iyataati kahapaamapipa nahataapaamuni ami isihya nahatiyaamuni ko jihatati ami ko isihyaanini kahatamatipetahiyaanini nahatiyaanini kopi giwunyaahohiyihyaanami omanjititihhi bindataise.

Nyahi Isihya Usaisi Maariho Akitinihi Numwitahaawo

¹² Ami Autaahaatiho sahi titihi apipaahiyaati kiyaatinihi komihyaatimatitaatiwi nasamihainjihhi sahi aimi noaipapi komi isihyaatimatauhi, ami ko komi maariho sangi apipaahi awaindihandi akitinihi nasanyataise. Isi ami sahi kimaiwa nepi isiwatiwi kaiwise. Sahi wonji waanji ami wowaatapi maariho asipaimbi asipiniwi iwitatamaniwi ami gaahati kainniwi itatamanjiniwise. Aiji sahi yatihhi ipatisaniwi isihya usaisawi nepi tunniwi mimuniwi yatihitiwi bipi napaisaati bimaawi ami isihya usa sangi mimaipisaihihiyaapi keti windi apomaasane. ¹³ Iyataati ami sami wongi utaaho wo wapa maipihapa kahisonihhi kopi piwiha waisapihonjitaapaahi ami gaasi ami sandi maipihandami naanjwaiwa kinyi nepi awitimapi utaaho maipihapa kahisihoi kapa kahimbipa nepumape. Sami maipihaiwa Awaisiho Kiraisi Jisaasiho aimi nesamasihyaatisi ami siri kireti sikaiwi usa sangi maipihapa kasisohipipa nepumapise. ¹⁴ Saiwa saiwi sahi nga kiyawaawi ami kaiwaami autaahi wamwaanji apipaahi jihhi awaindihandi sahi isihya Kiraisihomi naisihya Autaahaatihomi manyinyai maariho nunyawise, ami maariho nunyohitihandi sandi nahataapai neti naasaimbipihemati naasaimbaahimati timaamahiwati wapaapi windi nausetimetati anitisati isiwatataiso. Iyati wapaisi daahemati nusatipihati ami wapa gaahapa nahataapai neti anditiwiwati isiwatihi timaamaitati otipipati kiyataise. Iyati sangi neti naasiyaatesamati tisamaamahiwataise. ¹⁵ Ami siyati Kiraisiho sangi neti yatihisiwati napaisaatisamasihhi, ami sahi yatihitiwi napaisaati napairihireti windi tunniwi ikwiniwi itihimaniwi bimaawise. Saiwi binyaihi ami sandi Kiraisiho komi maariho omanjititihhi titihhi yatihiwitati napaisaatitindihandi sangi nasamindihandi sangi sami maarihoatihhi jainjatane. Ami sikaiwi sikireti daiwi windi tunniwi muniwi itihimaniwi ususaati yatihhi napaisaati Kiraisihomi isihyaati (nehi sangi

samihapihi) bimitaatiwi Autaahaatiho gaatati nasamaati nasamahanati neti ahosihihyaatiso. Sahi bapawi nasisoaari Autaahaatihoai, 'kinyi gaahonje gaare,' undiwise. ¹⁶ Aiwi Kiraisihomi piwiha wapa gaahaiwa anaahipipa nawihoni aŋaŋi tisaitati ahotipatamatiyati sami maariho omanjitihi tisaitiwi nepi kipwiwise. Aiwi sahi woni waŋi wo waati sahi gaahaiwa Kiraisiho nasamiwaiwa katiwunjawu, ami baiwi mmonipinjawi mwitipisawi kaiwunjawu. Aiwi aunihihiri Autaahaatihomi utipihoaatihi ahotirihiri aunihitiwi ami Kiraisihomi isihyaati Autaahaatihomi manyinyaatami aunihihiri sami utipihoaatihapihiri aunihitiwi ami aunihihiri wiwa Autaahaatihomi Itipihoni neti sami omanjitihi maarihoatihi gisunyaahonihiri aunihitiwise. Aunihitiwi Autaahaatihoai mepi autaahepumapi sami maariho omanjitihi Autaahaatihoai kinyi gaahonje gaare undiwise. ¹⁷ Aiwi sami piwiha katiwi ami piwaatohihaaraahuni, ami sami otipipati kiyohiwaiwaraahuni, ami wapa wapa nahataapa sahi kiyohipipa Awaisiho Jisasi Kiraisihomi ambipata kaiwi ami komi ambipati sati kataahi nyami Apiho Autaahaatihoai saundiwise, 'Kinyi gaahonje gaare,' undiwise.

**Kiraisihopi Giwunyaahohiyihyaanami Nususapuni Ami
Kiraisihomi Wanihyaani Asiyihyaanimatohiyihyaanapi
Poriho Piwiha Katindihandapihaare**

¹⁸ Sahi asihyaati usihiyai namaatohiyihyaate, sami siwoyaami piwiha atiwiwi kiyaami asimwaatitihini pinuwise, ami usihya siya sahi namaatiwi nususaatami anjipihini jatawaawi sapa saitihawo tiwi piwiha kiya jihimatiwi katawaatowo. Sahi saiwi saitaatiwi Autaahaatiho mmonataati gaare, ami sahi aimi Kiraisihoai nunyaniwi niwipinjawihyaatiso. ¹⁹ Sahi usihyaati aimi namaatiwihyaate, sami siwaasihiyai wapa waapihundiwi kiyaami maariho omanjitihi neti niwinaamanahireti wapa kawiwu kamundiwise.

²⁰ Manyinyaate, sahi sami siniya japiyaami kasatohipipa nahataapa atiwiwi kaiwi kiyaami otitihini pinuwise. Sahi manyinyaati Kiraisihoai nunyaniwi kopi giwunyaahohiyihyaati sami siniya japiyaami piwiha kasatohipipa nahataapa kapa kaitaatiwihandapi Autaahaatiho maaritani komi maariho wiwitataise. ²¹ Sahi manyinyaami sapiyaate, sami manyinyaami maariho omanjitihi nepi niwinaamaniwi nusopisasawi itihitiwi apowitandihiretemaamapise. Ami wiwa kiya saiwi itihitiwi, ami nyahi wapa gaahapa nga windi kamaito, tiwi gwinyapendaawo.

**Otipatihyaapuni Ami Kiyaami Awaisawihyaapi
Poriho Katindihandapihaare**

²² Sahi otipatihyaati utaaho wo sangi nasamaati nehi komi otipatihyaatesamati jainjaati bimihini koisawi bindawaawi komi

otipipati nawiho owehati kawisohiyihyaate, sangi jainjatisihomi piwiha kasatimbipa nahataapa atiwewise. Ami sahi wiwa saiwi gwinyaapi nyangi nyainjatohiyihya nyapi satiwi, nyami otipipatihya kimiya gaahyaare, tiwi ginyunyaito tiwi kiya sami awaisawihya jainjatohiyihya deti bitosaihihuraahih otipipati napaitiwi kaitaawo. Sahi saiwi windi kamaiwi ami kiya deti bitotawa jainjasaihihuraaro e ami kiya kaanihi waapihitiwi maasinjasahihuraisangi napaitiwi kiyaami otipipati nasisoaari kawiwise, ami sahi sami Awaisiho Jisasi Kiraisihopi nga gaahireti ko gaahosi nyapi maarititaiso tiwi gwinyaapi kiyawaayowo, ami nehi isihyaahih sapi kiya otipipati nga kanyisawaayopo, tiwi sapi maaritiwi jasondaatiwi sahi kiyawaamaayowo. ²³ Isi otipipati witi witi kiyawaahati baiwi napaitiwi nawihaiwi kaiwise. Iyawaawi sahi isihya Awaisiho Jisasi Kiraisihomi otipipati kawisohiyihyaamataiwi sangi jainjatohiyihyaami otipipati kawiwise, ami isihya nehi isihyaami maapi otipipati kawisohiyihyaamataiwi sahi windi kamaiwise. ²⁴ Ami sahi sangi jainjatisiho Kiraisihomi otipipati akitinihi kawisawaayopo. Isi ami sahi gwinyaapise. Ko Awaisiho sawaho sahi otipipati kopi kawisohipipaapi wihoaanjhapa nawihomatiyati Autaahaatiho Kiraisihomi isihyai numwitandi namihanati ahaimbipa gaahaiwa nasamitaise. Ami sahi Kiraisihomi otipipatihyaatitih ko sangi akitinihi jainjatataiso. ²⁵ Autaahaatiho isihyaami kiyohiwaiwa nehi naaso naasomihetemati tiwitapaati naasapiti kati kiyati usonaahosi ami utaaho wo maipihandi kaisihoai kamwaanj wihoaanjhandi yaawihandi Autaahaatiho numwitaise, nawiho otipipati wapa kaimbipaapi wihoaanjhapa nesipata matiyato.

4 ¹ Sahi iwinjatohiyihyaate, sami otipipatihya nawiho namepi nehihandi sami otipipati kasiwi nehi otipipatihatimaimatohiyihyai sahi gaahati kawiwiti titih gaahireti gaahapa kapaara sami otipipati kasitaatiwihapa nunyaw iwatatamaniwise. Sahi sawanaati aimi mmoniwihyaate, sangisangi nehihatimaati sami otipipatihatimaamataiwi ihyaatangi jainjatisiho Kiraisi Jisaasiho yamihapataatih bindataise.

Andititaati Gaapundaati Titih Daitihaawo

² Sahi windi namopi ami windi ikimaaniwi naingaapi jatawaawi mwitetiwi anditati napamapi kiyaatinihi gaapundiwise. Sahi Autaahaatihoai piwaundohipipaapi ahapaapi piwaundaati gaapundihaayono, tiwi sami amitiha biyati nga jainjapwaatonih gwinyaapise. Gaapundawaawi gaarehandisawi ahoyawi Autaahaatihoai saundiwise, 'kinyi gaahone gaare,' undiwi piwaundiwi gaapundiwise. ³ Autaahaatiho nyangi nyatatamanati anditinyaiwitandi sahi nyapimaawi gaapundiwise. Ko daihira nuwati japwaahonih nyahi Kiraisihomi piwiha ausaitaani sahi koai nunjeniw piwaundiwise. Piwiha sa Kiraisihopiha

jihura noaasandisiha wani aimi auta noaipasihaaro. Iyataati ami piwiha isihiya atiwi naitaatiwihandapi poundihi ningi kiya nanipuwawaayopo. ⁴Sahi nisapi gaapundiwise, ami nini Autaahaatiho komi piwiha awusaitandi gwinyaati maaritirihireti bairi nga awusaitaano.

⁵Sahi isihiya Kiraisihopi windi gimaawunyaahohiyihiyaisawi bindawaahura sami amitiha gaahireti gwinyaapi ami titihi gaahiretihi sahi wapa kiyawaahapa kiyaami ndiheti kaiwise. Asisiha auhurura wura sahi mmoniwi isiwatopipa nepi namihiriwi baiwi isiwatawaawi Kiraisihometirihiretapi kopi gimaawunyaahohiyihiyai piwaundiwi nunjawise. ⁶Iyawaawi sahi nasisoari piwiha nehi gaahaahihi katiwise. Iyawaawi piwiha isihiya atitaatiwi maaritohihaahihi nasisoari katiwise. Aiwi sahi baiwi gwinyaapise, isihiya sangi (wapaapi) nasisehohiyihiyai kiya nasisehohipipaami wihoanjihandi titihi gaahireti kiya nga gwinyaitaatiwihireti kaunditaatiwo.

Porihō Tikikusiya Onesimaasiya Natausaasihi Maisahuri Korosihandaahapi Nomaise

⁷Nini otipipati kiyohipatapi Tikikusiho nahataapa sangi kasatitaise. Tikikusiho so nyamatiyati Kiraisihopi giwunyaahosi nyami naisoho akohore. Iyati ko nyangisati maasi otipipati kiyataise. Iyati ami ko Awaisihomi otipipatiho akoho otipipati nga napaitati kiyahore. Iyati ko nyangisati maasi otipipati ninawipihi kiyohiyihiyaanini koai maariho biyaati nga nunyaahore. ⁸Nini Tikikusihoai nandusaasohitimandi tanyaaha kimaape. Ko sapi kiya ninapitaiwi bindawaayopo, tati daayati sangi jati jasondande. Iyati ami ko sangi Porihōaisawihiya saiwi saiwi bindawaayopo satonihī, ami sahi nisapuni naisihya Kiraisihomi otipipati ningisawi maasi kiyawa bimohiyihiyaapuni sahi gwinyaitaatiwihandi nepi mmondaatiwe. Iyati ami ko sangi anditisaihonihi sami maariho wisaitonihi sahi japihi maarititaatiwo. ⁹Nini Onesimaasihoai Tikikusihoaisati maasi nandusoasataayoni kuri sangisenda maasi napitaise. Onesimaasiho so nyahi kimbihyaani Kiraisihomi naisihyaani maariho apipaahi nga nunyaahore. Iyati ko apipaahi gaaho napaitarihore. Iyati ko sahi sawanaati Kiraisihopi giwunyaahohiyihiyaati Korosihyaatamihore. Nyahi Kiraisihomi otipipatihiyaanini kimbihyaani Onesimaasiho apipaahi gaaho napaitarihotihi kopi nga gwinyaawa usonaati koai autaahi newa isiwataahore. Ko Tikikusihoaisati maasi sangisenda napitaise.

Porihō Kiraisihomi Naisihya Korosihiyai Gaahuraare Undataase

¹⁰⁻¹¹Utaahingwaasi murimingwaasi ningisawi ningi anditinipi otipipati maasi ninawipihi kiyaati Autaahaatiho komi isihiyai winjatindihandi newaati awaindewaamaati kiyohingingwaasi Judaahiyaanamihingwaasi

nehi murimingwaasihie. Nehi singwaasihi ningi nga baiwi itatamaniwi anditiniwawaayopo. Iyataati ami sikingwaasi maawi gaahuraare satawaatopo. Kingwaasami wo Arisitakaasiho ningisa maasi naputiha bimohiho sangi gaahuraare, satataase. Iyati ami kiyaami wo Maakiho Banapaasihomi sanaimwaaho sangi gaahuraare, satataase. Iyataati so Maakihopi piwiha aimi sangi kasatonihhi (ami ko sangisenda nasonaahi sahi koai baiwi usoniwi numwaapise). Ami kiyaami wo Jasitusiho (ami piwiha Girikihaara Jisaasiho tiwi ambihitiwiho) koai maawi sangi gaahuraare, satataase. Nehi singwaasihhi Judaahiyaami otihatihapi (nepemaitiwi) Jisaasihopi giwunyaapihingwaase. Singwaasi nisi maariho omanititihhi nepi usaaniwi winipi yatihinipi gaanimawaayopo. ¹²Iyataati Epapiraasiho sahi sawanaatami naisoho sangi gaahuraare, satataase. So Epapiraasiso Kiraisi Jisaasihomi otipipati kawisihore. Iyataati ko nasisoari sapi andititahi mwitipisati gaapisundati Autaahaatihoai piwaundati nunjenataise, ko sangi neti anditisaihonihi sahi sami Kiraisihopi giwunyaahohitihandi anitiwi isipi bitopi, ami Autaahaatihomihaiwa wapaapi sahi windi nausetihimetiwi gaatiwi, ami Autaahaatiho gwinyaati maaritimbipa nahataapaapi sahi nga mmondaatiwo. ¹³Ami nini niwahonini Epapiraasihoai iwinjahonihi sangi jatatananati anditisaiwitandi otipipati anditahi napamati waati kairihiretapi nini sangi akite ndi kasatataato. Sahi Kiraisihomi isihyaati aunahipati awaipati Korosihandaahiyaatangisuni ami Kiraisihomi isihya aunahipati awaipati Reotesiyaahandaahiyaaisuni, ami aunahipati awaipati Iraporisihandaahiyaaisuni jatatananandi Epapiraasiho otipipati waati asakiyati pihitahi kiyataise. ¹⁴Ami nisuni ningisawi maasi kimbihhi bimohiyihyaamuni timbipaapi nyainjatisiho ami nyahi koai maariho apipaahi awaindihandi nunyaati biyaati giwunyaawaati usohohiho Rukihouni ami wo Demaasihouni kuri sangi gaahuraare, satamaase. ¹⁵Nyahi kimbihhi bimohiyihyaanamami ngaahuraarehandi nyami naisihya nyamataiwi Kiraisihopi giwunyaahohiyihya aunahipati awaipati Reotesiyaahandaahiyaaisuni, ami Kiraisihomi isihya Kiraisihomi naisaamaati Nimbaahaatami anjipihhi ahoyaniwi Autaahaatihomi piwiha kaniwi Autaahaatihoai mepi autaahepumapi piwaundiwi nahowisohiyihyaaisuni kanyundiwi nunyawise. ¹⁶Sahi Korosihandaahiyaati kimandi utipimandi awitiwi atiwi owetanihi, ami Reotesiyaahandaahiyaaisangi nahatiyaami otihaati awitiwi atitaatiwi kiyaapi nusoasawise. Aiwi ami nini utipihandi Reotesiyaahiyaapi nusoasohitihandisangi, ami sahi nepi awitiwi atiwise. ¹⁷Saiwi ami sahi Arikipusihoai saundiwi kaundiwise. Ami kinyi Awaisiho Kiraisi Jisaasihoaisapi timaamaitipi bindapaapi kopi otipipati kawitaapi gi nangimihaniwi nahinyohipatamihihoaanji kinyi mitiho nusoasapi kaimbi gaamapi owemape undiwise.

¹⁸Nini Porihonini niwahonini nisi ikwira utipimandi kimandi sapi jipatipiyataayo. Ami sahi satiwi, Poriho sawaho komi ikwira utipimandi kimandi akiti jipatipiyataise, tiwi mmondaatiwo. Nini daahi naputiti bindataayoni ami sahi nisapi windi nanipimimatiwi baiwi ginunyaapi gaapundiwise, ningi Autaahaatiho anditiniwati nitatamanitando. Ami nyami Awaisiho Kiraisi Jisaasiho sangi gaahandi kasitandi nini sapi gaap isundataayo.